



Siverth K. Heilmann  
Atassut

UKA 2021/168  
9. november 2021

**Tunngaviusumik inatsisissaq pillugu isumalioqatigiisitap unitsinnissaa, kiisalu isumalioqatigiissitami sulinerup unitsinneqarnissaa pillugu Inatsisartut aalajangiinerannit atuutilersussamik Naalakkersuisut peqquneqassasut Inatsisartut aalajangiiffigisassaattut siunnersuut.**

(Inatsisartunut ilaasortaq Aqqalu C. Jerimiassen, Atassut)

Siullermik siunnersuuteqartoq inatsisartuni ilaasortaq Aqqalu C. Jerimiassen, Atassut siunnersuutinnut isummorsorfigissallugu soqutiginaratumut qujanaq, imatullu Atassummiit oqaaseqarfigissavarput.

Siunnersuuteqartoq tunngavilersuutaa, naatsukullammik oqaatigalugu ersarilluarpoq, tunngaviusumik inatsisissaq pillugu isumalioqatigiissitap sulinera unitsinneqarallarnissaanik imaqarmat, taamaalillunilu ukiumoortumik aningaasaliissutigineqartartut 5 mio kr.-nik sinneqartut sipaarutigineqarallartariaqartut.

Atassummiit siunnersuuteqartuulli isumaqarpugut, 5 mio kr.-nit sinnillit pappilissatigut ukiumoortumik suliaqarnerinnakkut namminiilivinnissaq pilersinneqarnaviangitsoq. Innuttaasunik taasisitsisoqarnikuunera inernalu Atassummiit ataqqivarput. Isertuutissanngilarput Atassummiit oqariartuutiguarsimagatsigut, namminiilivinnissamut Nunarput suli uterpara suli piareersimangitsugut. Qineqqusaarnerni maani inatsisartut oqaluttarfianniit tusagassiorfitsigullu piareersimanginnitsinnut tunngavilersuuteqartarsimaqaagut, allaallu suli ukiuni 30-it ikinnerpaamik piareersarluarsimanissatsinnut utaqqisariaqartugut.

Soorlumi siunnersuuteqartup tunngavilersuuteqarnermini ersarissaaqqippoq, inuit pisinnaangorsartariaqarigut, imminut napatissinnaangorsaanissaq, namminersorlutik inuunertik ingerlatissagaat, namminersortutullu suliffeqarfinnik aallartitsisinnaangorsaaariaqartugut. Qulaaniit suaaruteqaannarani, inuilli peqqissut, toqqissisimasut namminiilivinnissamut pilersitseqataasutut misigisimasariaqartut.

Sukkanerpaamik partiit ilaasa, Nunatta namminiilivinnissaanik anguniagaqarnerat takorluuisarnerallu imminut ataqatigiinngitsumik manna tikillugu Nunatsinni ineriartortoqarnera nassuerutigineqartarialerpoq. Aap ilinniarsimassutsikkut pingaartumik inuusuttagut siuariartorneq Atassummiit nuannaarutigeqaarput.

Nunattali nammineq suli inuussutissarsiornikkut aningaasarsiornikkullu annertunerungaartumik siuariartortoqarsinnaagaluartoq, suliffissaaleqisoqarluaraluartoq kiisa avataaniit sulisussanik

tikiorartitsinersuaq illoqarfippassuarni, aatsaat taamak tikisitat avataaneersut atugaaleraluttuinnarnerinut kommuunet unittoortoqaqqunagit akuersiinnartalerpugut.

Nammineq sapinngilagut, nammineq pisinnaavugummik partiit namminiilivinnissamik oqariartuuteqartarnerat oqarluartaanerinnaajuaannassanngippat, siunnersuuteqartup aalajangiiffigisassatut siunnersuutaa, tamanit paasineqarluni isumaqatigineqarluni unitsikkallarneqarnissaalu neriutigeqaarput. Atassut siunnersuummut tamakkiisumik isumaqataavoq.

Taamatut Atassummiit oqaaseqarluta inassutigissavarput, suliap aappassaaneerneqartigani ataatsimiititaliamut susassaqtumut peqqissaarussamik suliarineqarneqaqqaassasoq.

Qujanaq.